



## D Luckebüesserbänk vom Muser Schang

www.muser-schang.ch

Gueten Obe mitenander – I by der Muser Schang!  
Hei Dir scho ghört vom Elvis und sym Bewegungsdrang?  
De heig im Grab sich ummedrüllt und an Deckel ginggt!  
Kei Wunder, wenn de Katzma ständig Love me tender singt!

Am Himmel über Lieschtel fliegt e Dubeschwarm,  
rot und wyss wie eusi Fahne, do wirs um sHärz mir warm,  
sit hundertfeufesibzig Johr nur Fryde, niene Fynd!  
Gnau do machts platsch und s rote Dübli schisst mir uf e Grind.

Was mache sich die Grüene au wieder Illusione  
vom Grosskanton, vom Zämmeschluss, vo Regio-Fusione!  
Die sy an dSchlachttyr uf der Hülfte jo nit mol ein cho schnappe,  
us Angscht, es gäbi dort für Gfasel grad nonemol uf dChappe!  
Der Chupferwullebaschtfraktion wet I e Rot mitschicke:  
Nit schwaafle, meh Konzentration ufs Ammedysslitricke!

Sit de alte Römer hei mir e Strossenetz  
und sit de alte Römer hei mir au e Strossegsetz!  
Doch sit de alte Römer ischs zLieschtel nie vorcho,  
dass uf der Kasärnestross muesch eim der Vortritt lo!

Jetzt han I Euch grad so ne schöne Värs welle verzelle,  
e ganz e luschtig fröhliche und erscht no topaktuelle,  
nur isch my Pointe jetz am Arsch, I weiss us sichrer Quelle,  
my Sujet isch mer eifach ab, ab uf Dagmerselle!

Sie, die Rueh isch herrlig gsy, die stilli Einsamkeit,  
kei Menscheseel het niene gstört, kei Lärme wyt und breit!  
Statt in de Ferie han I do dehei Chräft chönne tanke!  
I möcht an dere Stell ganz hätzlig für's nünzte Stadion danke!

Do letschi sy mer zämme ins Chaschperlitheater,  
wäg dem Chaschperli han I no hüte Muskelkater,  
wenn de doch ewigs zweite macht, dass alls vor Lache hült,  
do gspürsch grad, wie sich ewigs au der Chaschper Baader fühlt!

De Peter Zwick isch vo Statur jo nit grad e Gringe,  
as Bueb scho heis em gseit, er wärdis no zu Grossem bringe!  
Doch numme lot sich Grosses au mit Grössli nit erzwingen,  
villicht hät me ihn synerzyt halt gscheyter gschickt go schwingen!

Set sRuschisch-Haschgift sniffe-kiffe wyter um sich gryfe,  
do het dFrau Pegoraro scho Plan B im Chopf lo ryfe:  
Me schänkt denn jedem Kiffer Stock und Huet und ladt ihn y  
an Lieschtler Banntag zum ne Tag Umgwöhnigstherapie!

I by glöst, I by entspannt, I by mental topfit!  
I by okay, e geile Typ – sisch super, dass my git!  
Hüte lauft mir kein dervo, hüt goht nüt in dHose!  
Do rüeft dFrau Chreihebüehl: Du Jörg, meinsch nützt die Sälbscht-  
hypnose?



Wenn alles, alles bade goht, no goht nur ein nit under,  
der Ballmer trotz e jedem Sturm, doch ischs nit mol e Wunder,  
wil in Physik und Politik die glyche Regle stimme:  
Je feisser öppis isch, desto länger mags au schwimme!

Der Tschortsch Bush läbt jetz gschützt dehei im Cowboyland,  
statt Personal trybt de dort nur no Rindli ummenand.  
Wenn die so ein so guet versorge, froggt me sich do chüehl,  
nämme die, wens nochen isch, au euse Chreihebüehl?

E bizzli Bildig wär scho guet und nit numme der Blick,  
drum froggt my jetz, in weli Schuel I eusen Ursli schick?  
In der Baumschuel weis en nit, I glaub, I schick der Urs  
zum Mühlise an Törlplatz in Latinischkurs!

E ledigs Bürli zLouel suecht e Frau in Pole,  
die strammi Olga het ihm passt, drum isch er die go hole.  
Die Olga macht sich guet im Stall, nur zum se nit verliere,  
do muess er dRindli halt mit rote Bändeli markiere!

Über myni Unterhose vo der Hanro byn I froh,  
die han I jetz scho zwanzig Johr, sie wärme immer no,  
drum ischs guet, blybt dHanro stoh, me het sich müesse wehre,  
wo hol mer süscht mol früschi Schlüch, wenn myni dräckig wäre?



D UBS isch nit nur blank, nei, au vor Ärger chrank:  
Jetzt chlaue die eus no dldee vo der mobile Bank!  
Die KB mit dem Luxusclapf, mit dem elitäre,  
mir mieche das mit Volontäre und mit Leiterchärre!

Rahmtäfel, Rahmtäfel hei mir as Chinder welle,  
Rahmtäfel vom Baselbiet, die traditionelle!  
Doch hüt mit dere Blochere und dene miese Gschichte,  
byn I froh, darf I wäg der Diabetes druf verzichte!

Runggle, Chürbis, Chabischöpf gits uf der Wanne z'chaufe  
und amme gseht me dort e glunges Mannli ummelaufe,  
ganz chlei mit Bart und Zeichnungsblock, e ganz e gspässigs Gschöpf,  
das suecht verzwyflet nach vergässne, letschte Stedtlichöpf!

D Amy Winehouse chunnt früschi frisiert zrug us der Rehabkur,  
au dBritney Spears het wieder e Figur und e Frisur!  
E neue Schnitt wirkt Wunder, drum froggt my: Bitteschön,  
wenn verzellt das ändlig öpper au der Sarah Jane?

I by do mol ins sRömisch Bad uf heisse Stei go schwitze,  
do chunnt e magri Bluti grad näbe my cho sitze.  
Sie seit Hallo, I wird nit froh und s mahnt my ganz echlei  
an Tschirgi, dort chunnt sGammelfleisch au uf heisse Stei!

Uf em Lyggstuehl zRimini lyt sVroni oben ohni,  
do seit e Herr: „Piacere, sono Silvio Berlusconi -  
que bella Signorina“, - doch jetz ischs Dumme numme:  
sVroni luegt by dicke, chleine Tschingge nit mol umme.

Znacht pöblet my e Bürschtli a und fuchtlet mit em Dolch,  
Do dank I: Hoppla, Jugendwalt, de armi chleini Strolch,  
de het e schveri Chindheit gha, wäg däm macht de so Sache!  
Drum han em vor Verbarme halt statt zwei nur eini bache!

Jetzt lueg emol, seit do my Frau, de Ma het doch e Grippe,  
so bleich, as würd er neggschtens zum Sässel usekippe,  
er durt my fascht, macht de so späckig e ganzi Färnschändig.  
Do säg I: Frau, denn het de Surbeck die Grippe aber ständig!

Der Bischof Koch het schlimmi Traum und nimmt e yschalts Bad,  
do seit e Stimm vo obe: My Sohn, mach Dy parat,  
denn gosch und holsch de Sabo zrug, au wenn de nit will kusche,  
immerhin het de nie gfroggt, wo dMinischtrante dusche!

Mys Rösli, seit der Toni Brunner, schafft zwömol fufzeh Liter,  
dasch my beschti Patriotin mit dem pralle Üter!  
Tuesch mit em rächt Gedankeguet em Rösli dZitze rybe,  
wirsch i dem Land e Spitzechraft, muesch nit mol chönne schrybe.

Der Mahmud Ahmadedschad rybt in de müde Auge:  
O Allah, wie cha dPolitik my nur eso uslaue?  
Jetzt hei mer doch der Calmy-Rey erscht grad e Chopftuech geh,  
worum tüe mir jetz dAuge no meh as vorhär weh?

Wo der Sämi Schmid am Schluss no us der Nase bluetet,  
han I gwüsst, de gueti Ma, er het sich z vil zuegmuetet!  
Die Nase isch e Zeiche vo allergröschtem Lyde,  
vom vile Sitze blüete süscht jo ehnder dHämorrhoid!

Der Obama het zur Wahl im Ueli Murer gratuliert,  
de schrybt zrug: Mr Präsident, Ihr Brief hat mich gerührt!  
Unsre Länder brauchen beide Macher und Beweger,  
jetzt kommt unsre Zeit, wir waren lang genug die Neger!

Mit me Pärli Halbschueh zielt ein im Bush uf dSchnure,  
de het sich aber grad no buckt, dSchueh fliege obe dure.  
Mit Halbschueh uf e Halbschueh, leider hets nit funktioniert!  
O, hät ers doch mit Nagelschueh grad nonemol probiert!

Der Papa Ratz, heil'ge Vater für alli Menschechinder,  
siehe, er vergit und sägnet no die schlimmschte Sünder,  
nur dAntibabypille chan er der Novartis nit vergeh!  
Schad, hets die zu Mama Ratzis Zyte noni geh!

